

研

經

室

集

擊經室再續集目錄

卷一

續一集經

鎮江柳孝廉春秋穀梁傳學序

釋真

薛子韵說文答問疏證序

節性齋主人小像跋

釋謂

擘經室再續集卷一

一集

鎮江柳孝廉春秋穀梁傳學序

六藝論云穀梁子善于經蓋以其親受微言于子夏最近于孔子也公羊與穀梁同師子夏而鄭氏起廢疾則以穀梁爲近孔子公羊爲六國時人然則善經近孔四字固此傳之確評矣世之治經者多治左氏公羊于穀梁慢之故余整齊百家爲

皇清經解千五百卷于左氏公羊皆有專家于穀梁無之心每欲然道光十六年始聞有鎮江柳氏學穀梁之事二十年夏柳氏興恩挾其書渡江來始得讀

聖經室再續集

卷一

一集

之知其專從善于經入手而善經則以屬辭比事爲據事與辭則以春秋日月等各例定之發憤沈思久乃卒業余甚惜見之之晚也亟望禮堂寫定授之梓人補學海之闕文與海內學者共之是余老年之一快也與恩爲余門生之門生貧而好學鎮江實學敦行之士也

釋眞

慎字从眞說文眞从目从𠂔𠂔所以乘載之余足病不能行近造一椅如𠂔形𠂔二人舉下二足使二人扶上背雖登舟登北湖樓𠂔皆甚輕便此欲如眞人



薛子韵說文答問疏證序

甘泉薛氏傳均字子韻深于許氏文字之學元未及見其人而早卒于閩實爲可傷所著說文荅問疏證一書元到揚州始得見揚州再刻之本所疏證者精確不磨而辭亦簡潔惜乎學優而命嗇也其書據錢氏段借之字而加證之元按薛氏名傳均字子韻卽以均韻而論蓋確有見于均之段借矣段借始周禮鄭注元竊謂說文有<sup>㊀</sup>字从言勻省聲籀文<sup>㊀</sup>不省鐘鼎文有<sup>𠂔</sup>字从<sup>𠂔</sup><sup>𠂔</sup>𠂔字界乎言音之間音字本出于言字而合一耳此二字無別乃韵之正字而<sup>㊀</sup>尤古卽說文<sup>㊀</sup>下重文之籀文也鐘鼎款識內有楚

曾侯鐘此鐘篆文拓本出于北宋至南宋王復齋得此搨本彙裝入款識冊內宋元人題跋甚多此冊今藏余家真爲三代古篆下猶史真跡一等楚篆內有楚王韵章亾曾侯乙宗彝之句韵篆爲冑形錢獻之釋韵爲能謂能爲熊乃楚君之姓章爲名然細審之迴非熊字而章名之上又無從加一韵字或楚王名有二字曰韵章耶音字之形界乎言音之間勾字非月非肉亦明白之至夫說文所無之字若確爲鐘鼎所有者說文本云郡國山川往往出鼎彝謂之前代古文冑字形聲不謬漢時薶土未出不能責許氏以

未見更不能因許氏未見卽謂之鄉壁虛造蔽所希聞况說文已收囀字特未審察耳因薛氏名與字及疏證段借之書聊書此一條以商之二劉君楚楠何孟瞻何如如以爲可則段氏音均表直應書爲音韵表薛氏號亦直書子韵特不可書从員之韻耳

節性齋主人小像跋

此圖爲予七十歲小像其景則雜取余集中選石采芝來鶴扶梅之意而爲之者也余講學不敢似學案立宗旨惟知言性則溯始召誥之節性迄于孟子之性善不立空談不生異說而已性字之造于周召之



前从心則包仁義禮智等在內从生則包味臭聲色  
等在內是故周召之時解性字者樸實不亂何也字  
如此實造事亦如此實講周召知性中有欲必須節  
之節者如有所節制使不逾尺寸也以節字制天下  
後世之性此聖人萬世可行得中庸之道也中庸之  
率性率同帥猶召誥之節性也故中庸曰天命之謂性  
性卽命也又曰君子居易以俟命易曰窮理盡性以  
至于命論語曰不知命無以爲君子也皆此道也余  
略有解釋於此書於圖後以示家塾而已至于各義  
已詳余性命古訓篇中壬辰孟春

虞夏書內無性字性字始見於書西伯戡黎天召誥

飾詩卷阿彌

古性字之義包於命字之中其字乃商

周華生之字非倉頡所造从心則包仁義等事

人非仁義

無以爲心

从生則包食色等事

人非食色無以生生

孟子曰動心忍

性若性但須復何必言忍忍卽節也卽宋人所言氣

質之性義理之性也天命之謂性性卽命也性字最

爲淺近明實自唐人以禪性爲詩書之性以性爲靈

明靜覺當復其初諱言食色而空言義理自此以後

言性者愈深遠而愈岐愈虛高而愈晦矣故余講性

以淺近明實爲主若言性而不易曉惟極靈之人始

能知之非天下古今同然之道矣

嫌東原易田兩君之說猶言之難而

人不

易曉又據魏書釋老志一切經音義而識破晉宋間

人以儒書之文筆老莊之性理翻入佛經又據唐李

翱復性書識破唐以後以禪宗之性翻爲儒說全改

詩書之性故余曰吾惟知尙書毛詩論語孟子而已

他說不暇言之

中庸天命之謂性性有味色聲臭

安佚又有仁義禮智又有福壽考終命惡弱等在內

凡此皆天所命也故性卽命命卽性性命又皆卽天

也中庸此一句最爲包括簡明

論語死生有命富

貴在天此二句簡明之至命與天可互文以見義譬

如曰死生在天富貴有命也然則天與命固同天命與性亦同也 夫子之言性與天道五十而知天命此性卽命也猶之曰天命也此實言人之死生富貴也天道卽天命也孔子五十而知天命天不使孔子得位爲東周但以教傳萬世也今人淺術尙能推人之命豈孔子不能知之孔子能知之而罕言之故曰不可得而聞也天道不但言人之死生富貴卽世之治亂亦在其中 詩曰俾爾彌爾性書曰考終命性卽命也彌性卽終命也窮理盡性以至于命言修身以俟不貳之壽彌終其年歲也 窮理盡性以至于

命窮卽盡也理卽天理天理滅矣四字見於禮記反觀其不可滅之物卽知所謂理者非空言之也書曰不虞天性又曰我生不有命在天此卽不虞天命也此恃天之初命不慮天之改其命也詩天生烝民其命匪謚靡不有初鮮克有終天命可改之證也畏天命者恃天命有定不求之則不畏也爲惡則天改命故可畏也爲善則天亦可改永命也

釋謂

毛詩標有梅迫其謂之爾雅謂勤也言出力助勤之也元云詩命彼後車謂之載之又召彼僕夫謂之載

矣言令彼後車出勤助之力而裝載之與爾雅同非但口召命之也若以謂爲命則已曰命彼召彼矣豈非又命之召之乎近讀鳧鷖詩福祿來爲箋爲猶助也元云此爲字與謂字無異出力之助與迫其謂之謂之載之相同言公尸出力福祿勤助也行露詩謂行多露此亦當訓勤露豈不行已勤行多露矣又蒹葭詩所謂伊人凡三見今人解詩似未白露時已屢說有此人而曰露時上下在水從之從之之人卽先言之人或賢人或懷人詩傳不應絕無所說元昔言標有梅迫其謂之絲蠻謂之載之出車謂之載矣隰

桑邈不謂矣此四謂字皆當訓勤此詩所謂伊人之  
謂亦當訓勤助求水中葭中之人與心乎愛矣邈不  
謂矣同較空指此人爲箸實此亦實事求是也甲辰  
霜降日書於長蘆庵東洲草廬

擘經室再續集目錄

卷二

續二集史

續疇人傳序

戶部尙書 太子太保何文安公神道碑銘

刑部尙書 太子太保史公神道碑銘

移建安淮寺碑

歙縣江鶴亭橙里二公傳

雷塘自定壽壙記

雷塘壽壙孔夫人先葬記

道橋別業愛吾草廬八韻序



劉孟瞻項羽都江都考跋

校刻宋元鎮江府志序

畢韞齋母郭孺人墓誌銘

江都春谷黃君墓誌銘

北渚二叔墓表

文學家幹王君墓表

學經室再續集卷二

二集

續疇人傳序

向疑八線表及八線對數表字數在一二百萬已上  
且盡數目之字非有文義可尋而字體微芒細碎叢  
密保無寫刻之譌緣從屢求句股所成無由讐校近  
見羅氏茗香以乾隆間明氏捷法校得八線對數表  
一度十三分二十秒正切第五字○誤作一又六度  
四十一分十秒正切第五字○誤作六又十二度五  
十分正弦第六字七誤作五又十六度三十二分十  
秒正切第七字九誤作○又四十二度三十二分四

十秒正切第九字五誤作四可見西人之所能者今人亦能之也羅氏又因讀四元玉鑑於如像招數一門有所會通更取明氏捷法御以天元知密率亦可招差其弧與弦矢互求之法與授時秣草之垛積招差一一符合且以祖氏之綴術失傳已久其法墮見於秦書卽大衍之連環求等遞減遞加亦與明氏捷法相近爰融會諸家法意爲撰綴術輯補二卷纂續微言興復絕學古人之名亦從茲不朽爲功匪淺明氏爲乾隆初滿洲人其割圓密率捷法海內無刊本與元朱松庭四元玉鑑等書皆出在嘉慶初疇人傳

成之後兩家之書又皆大有裨於秣數在昔聖人治  
易畫象獨於革卦一則曰治秣明時取諸革再則曰  
天地革而四時成夫曰三月成時月三日成霸霸之  
義从月亦从革說文革更也故術家因之隨時修改  
以求合於天行自古以來所以有七十餘家之術而  
授時歲實之上考用長下推用消黃赤大距之古大  
今小歲差之古今不同皆其明證非古人之心思才  
力不逮今人亦非古法之疏不若今法之密蓋迫於  
積漸生差術以是見疏耳漢洛下閎謂太初術八百  
歲當差一日亦本取革之義自西人尙巧算屢經實

測修改精務求精又值中法湮替之時遂使乘閒居  
奇世人好異喜新同聲附和不知九重本諸天問借  
根昉自天元西人亦未始不暗襲我中土之成說成  
法而改易其名色耳如諸輪變爲橢圓不同心天變  
爲地球動是已元且思張平子有地動儀其器不傳  
舊說以爲能知地震非也元竊以爲此地動天不動  
之儀也然則蔣友仁之謂地動或本於此或爲暗合  
未可知也西法之最善者無過八線然舍表無以布  
算苟如羅氏以密率招差是其法亦無異乎元朝授  
時秣草更安知八線表不亦由於此乎世之學者卑

無高論且因八線對數以加減代乘除競趨簡便曰  
習其術罔識其故致古人精詣盡晦矣夫爲數之道  
首在虞書辨氣朔之盈虛課日月五星之遲疾因時  
制宜卽孟子所謂苟求其故此亦實事求是最大最  
難者也枚乘七發曰孟子持籌而算之萬不失一此  
漢人亦必有所本前傳未列孟子應否補列請思酌  
之方今

聖世六藝昌明佚書大顯後有疇人思欲復古將見  
大衍爲考古之根天元爲開來之具綴術爲五星之  
用招差爲八線之資合大衍約分天元寄毋綴術求

等招差纍積又爲後學之權衡斯又宋元來復見之  
各書所亟宜甄錄而表章也元少壯本昧於天算惟  
聞李氏尙之焦氏里堂言天算尙之往來杭署搜列  
各書與元商撰成疇人傳今老病告歸田里更爲昏  
耄又喜得羅氏茗香論古天算有如此羅氏補續疇  
人各有列傳用補前傳所未收者得補遺十二人附  
見五人續補十九人附見七人大凡四十三人離爲  
六卷次於前傳四十六卷之後統前傳共成五十二  
卷容有挂漏俟再續焉又宋元間算法所指太極天  
元四元大衍等名皆用假判真借虛課實以爲先後

彼此地位之分別耳非如道學家言確有太極天地之道貫乎其中至術數占候及太乙壬遁符讖之流則尤明赫明算者所不屑言也前傳凡例已詳析之茲更不及之道光二十年夏四月

誥授光祿大夫

經筵講官戶部尙書

晉贈太

子太保謚文安何公神道碑銘

并序

公諱淩漢字雲門亦字仙槎先世青州益都宋南渡至道州爲東門何氏十二世泰來明萬厯拔貢生授南京蒙城縣知縣升貴州普安州知州繼兄子其諤爲嗣廩生充國子監生鴻臚寺主簿子鳴鳳廩生鼎



革之際臨貢堅辭有默齋詩集子之涓增生公之高  
祖也曾祖盡生員娶趙氏祖志儀廩生娶周氏子三  
長文統季文繡次文繪字章五廩生爲公之父三代  
皆以公貴 贈光祿大夫工部尙書一品夫人章

五公娶鄭太夫人生子二公其仲也公幼慧能盡孝  
敬章五公以學行伏一時公稟庭訓恆跪而受讀九  
歲應童子試若成人年十六州府試皆第一補附學  
生家極貧連丁內外艱困苦思自振拔益勤於學夜  
不能具鐙燭恆然松枝自照讀經書必兼傳注食餼  
後交譽日起從學者自遠至嚴立課程至今其鄉學

者謂吾州經師人師自公後無能繼者嘉慶六年充  
辛酉科選拔貢生明年 朝考一等爲吏部七品小  
京官文選司行走有雜職官被議鐫級聲明乾隆某  
年有 恩詔加級或以無冊可稽駁之公曰冊  
雖毀 恩詔固在也冢宰韙其言許之九年應  
京兆試中式舉人十年成進士 殿試卷進呈名列  
第四

睿皇帝謂筆墨飛舞拔置第三

賜及第授翰林院編修十二年充廣東鄉試副考官  
明年散館一等充順天鄉試同考官累充 文穎館

國史館纂修總纂 文淵閣校理 咸安宮總裁

武英殿提調十九年升國子監司業轉左春坊左

中允充 日講起居注官升司經局洗馬轉翰林院

侍講侍讀右春坊右庶子二十四年充福建鄉試正

考官升國子監祭酒

今上登極

覃恩得廕一子時已命次子紹業爲兄凌灝嗣合得

四品廕生以慰兄心

昌陵奉安 派扈

駕大臣隨入

地官道光二年充山東鄉試正考官留督學政轉翰林院侍讀學士每試日靜坐堂皇閱卷胥役悉閉置一屋不少假嘗入奏云場中多一查弊之人卽多一作弊之人又云臣以爲防弊之道苟挈其要領無事煩苛奉

硃諭褒許甚渥歲試時通諭各屬生員於來年科試年貌冊中自行填注誦習何經以便考校故所取乙酉科拔貢生多治樸學者試院中種竹數百竿忽產蓍六莖數曰高七八尺因顏曰瑞蓍書屋並爲之記四年轉通政使司副使五年冬差滿入都

派稽察右翼宗學六年春補授順天府府尹

時前尹朱公爲弼無被議事而調任府丞公蒙

特擢

召對時有人品學問朕所深知之

論

蓋在

帝簡中久矣甫莅任卽立內號簿飭屬訊案每月按簿催結得無留獄八年元旦逆回張格爾就擒

上以公於協剿回疆之吉林黑龍江官兵由京進發彈壓靜謐支應妥速兩次交部優敘順天所屬州縣擢至四路同知更無升途公以人材須鼓勵會大名府缺出與直督熟商會奏得

旨以西路同知辛文祉補授遂開此例京畿獄訟繁

多自府縣收理各案外由刑部都察院提督府奏交  
咨送無虛日公盡心研究大要以罪疑惟輕務歸仁  
厚如宛平縣民張文恭等曾習天主教改悔免罪漏  
繳經卷蔓累多人涿州民果三毆死白兌兒棄屍大  
清河三載無獲等案一則援例減等一則奏請暫行  
監禁惟於兇盜案件謂宜懲一警百如拏獲奪犯傷  
差窩賊馬七等拏究兇惡棍匪王殿臣等皆從嚴訊  
辦府解後有廢園就蒔花竹爲退思之地顏其亭曰  
佳晴喜雨快雪之亭志無忘民事也十年立春日循  
例進春

上召問春牛顏色起於何時公奏月令稱出土牛並無顏色宋時頒行土牛經支幹各色略與今同始於仁宗景祐元年其博洽強記多類此七月有

旨命 大阿哥祭

孝穆皇后陵寢公以大雨時行橋道難恃面奏請改派親王大臣

上深然之卽改派尹茲五年地方綏靜命盜各案甚稀

聖心倚注久任不遷是年復調吉林黑龍江兵征臺灣彈壓 予優敘如前八月授大理寺卿仍署府

尹事十一年署兵部右侍郎授都察院左副都御史  
升工部右侍郎兼管錢法堂事務署禮部左侍郎充  
浙江鄉試正考官留督學政重經解訪優行試事整  
肅士習益醇廩有桃李門元督學時所署也公補植  
桃李數百株蔚然成林長興學附生葉大成丁降服  
憂有增生缺出公咨禮部略曰例載爲人後者爲其  
本生父母齊衰不杖期注云仕者解任士子輟考學  
政全書載廩增生遇降服喪不許應試無庸出缺至  
廩增缺出是否敘補例無明文致歷來辦理參差夫  
官員降服已無升補之班士子降服猶循敘補之舊



聖朝三才集卷之二  
於例本未畫一旦親喪固所自盡降服已屬抑情若  
復使之敘補一如無服之人於情亦有未安應請核  
准通行是時又特命公偕督臣程祖洛審訊山  
陰會稽紳幕書役勾結舞弊一案研究月餘定讞擬  
在籍臬司李澐褫職餘犯軍流有差

帝嘉明允十三年春調補吏部右侍郎兼順天府府  
尹事 命卽來京供職時歲試未終也公益請共  
爾位和而不同如吏部原議捐賑鼓勵章程有各衙  
門候補人員准捐銀儘先補用一條已具稿矣公曰  
儘先可捐則正途之缺轉可爲捐班所有而正途亦

非挾貲不得於官方吏治所傷實多同人以爲然原議乃寢時濬九門護城河以工代賑數萬人

上問工竣如何資送公奏附近京城之民無庸資送其隸外州縣及外省者應於散工日給盤川錢二百文再給印票一張注明制錢五百文回本籍衙門承領貧民歸有餘資散歸必遠奉

旨允行調補戶部左侍郎兼署右侍郎管理錢法堂事務再調吏部右侍郎仍署戶部右侍郎時湖廣總督訥爾經額等奏苗疆屯防變通章程

命戶部議奏同官因係湖南事情專屬公具稿乃援

據舊章體察現在情形逐條籌覆准駁相半總歸於  
遴選廉能代謀生計同官折服不易其一字十四年  
升都察院左都御史仍兼順天府府尹事

賜紫禁城騎馬進工部尙書仍兼署左都御史奉

命查勘明陵充 經筵講官十五年充會試副總裁

教習庶吉士十六年奏永杜回漕錮弊公飭查順天  
各屬大小水路續圖籌緝始奏定水次鋪戶存貯粗  
米不得過十石之例疊署吏部尙書十七年吏部因

京察一等人員有先由御史改官者已議駁矣公  
以不勝御史非不勝外任者比如此苛繩有妨言路

援筆改議遂奉

俞旨十九年春調補戶部尙書仍署吏部尙書是年秋充順天鄉試副考官時公長子編修紹基亦典試福建距公使閩時恰二十年父子同科典京外試者前此惟乾隆丙子科劉文正公文清公父子庚寅科劉文定公青垣侍郎父子而已後先濟美同朝羨之公於吏戶工三部皆久任遇公議事件多賴公爲主持從容正直熟思利弊鉅細一無所苟於政體人才特爲顧惜當戶部假照案發先後在捐納房司員皆獲咎嘗爲

上言其中人材甚有可惜者而准其捐復之

旨隨下吏部功司議處有近於文致者必往復剖論冀存寬大於工部司員拔其樸實任事者資緣悉絕升轉之路遂通二十年春值

孝全皇后喪齊集西淀十餘日歸寓偶病寒猶力疾趨公因精神短少陳請 賞假甫 命下遽不

起口授遺摺而逝時是年二月五日也年六十有九上嗟歎悼惜久之有品行端謹辦事勤慎等 諭

贈太子太保

賜祭葬諡文安據諡法勤學

好問曰文止於義理曰安我 朝二百年來得此諡

者自公始易名之典洵足與先儒陸文安公金文安公相媲美云公孝友純篤居恒莊敬刻厲家範嚴肅爲時所稱通籍四十年未嘗一干吏議在詞館攻苦如秀才時泊官書自立程法 國史傳志手錄其子目以便檢校於蒙古地名滿洲人名尤詳總辦起居注所爲前後序掌院曹文正公稱爲傑作未嘗與本衙門撰文遇 誥冊文字重大者多屬公撰擬以公書法重海內屬敬書全唐文 御序付梓兩次以講官隨 圍和 仁宗御製詩甚多壬申戊寅大考皆二等

賜文綺辛未甲戌己卯三爲庶常小教習其殿廷  
文字之役自辛卯迄丁酉派閱覆試朝考散  
館試差大考漢教習卷絡繹無閒前後任京兆最久  
凡察吏安民弭盜備荒諸政不勝書勘估督修諸要  
工十餘次承辦

孝穆皇后梓宮由寶華峪奉移至龍泉峪奉特

旨改派公代賽公尙阿往每有遷擢必兼他職九掌  
文衡五權篆宰四派經筵直講以京尹而歲

賜參貂以尙書而賜二等參頭等貂六次

賜福字皆特命入乾清宮侍書寵

光稠疊錫賚便蕃可謂人臣知遇之最榮矣著謨詩  
文爲雲腴山房集所書碑版學者珍習之配廖夫人  
子四紹基丙申進士翰林院編修紹業廕生候選縣  
主簿出爲兄嗣先歿紹祺紹京皆舉人孫慶涵監生  
慶深鼎官聯官孫女八紹基等奉柩歸葬于谷山下  
九子嶺之陽將至揚州先以狀來乞元爲神道碑元  
荒耄家居因與公雅故又紹基爲余教習庶吉士之  
翰林在京嘗以學術相善謹按狀敘而銘之曰

自公幼學經師人師

帝擢魁鼎館職試詞

冊誥鴻文屬鉅筆爲文章



經史班韓是追書法晉唐寶若鼎彝奉使衡文品學  
兼資魯齊教行室生瑞著卿歷五部職效三司久任  
京兆三輔安治鋤奸弭盜儒雅便宜愛人節用慎於  
度支弼 聖敷化謨慮書思官四十年吏議弗罹  
循理度義易名典垂公子大器繼昌於時我衰穎突  
勉文此碑

道光二十有一年歲次辛丑冬十有二月八日丁亥  
建

誥授光祿大夫 經筵講官刑部尙書 贈太子

太保 諭賜葬祭史公神道碑

宮保諱致儼字容莊號望之又號問山年七十後自號榕莊老人又自號樗翁先世出漢溧陽侯史崇後傳至諱必相者於明洪武四年遷揚州之江都縣曾祖道義祖積學父元善世以學行爲名諸生以宮保

貴累

贈光祿大夫刑部尙書曾祖母董祖母魯

母蔣皆累

贈一品太夫人元善公生四子宮保

其仲也八歲讀書卽考訂周禮人民物產室恆不舉火太夫人以針黹易油父子一席讀年十六入江都學學使謝金圃先生壻歎爲奇才詢知家貧給膏火以助讀焉家無書詣學宮讀所頒書於尊經閣年

二十七補廩膳生乾隆甲辰

純皇帝南巡以學使薦赴 召試時與試者車馬

僕從甚都宮保囊餘十八錢薄暮無所投宿露坐田  
家石磨上後婁述之謂彼時心無所慕臥觀星斗頗  
覺自適蓋富貴貧賤恬然胸中自少已然矣壬子舉  
於鄉嘉慶己未會試元副朱文正公爲總裁宮保中  
式第一名

仁宗問元曰會元是汝揚州人元對以寒士有品學  
及居尊經閣讀書狀 殿試賜進士出身改庶吉士  
是科得人最盛績學如武進張惠言高郵王引之歟

縣鮑桂星全椒吳鼎福州陳壽祺棲霞郝懿行武威  
張澍其通顯歷中外者自湯相國金釗盧敏肅以  
下又數十人而宮保爲之冠是年五星聚奎文正因  
作五緯聯珠圖議者謂國家科目斯最盛也辛酉  
散館一等授職翰林院編修甲子充順天鄉試同考  
官累充國史館協修纂修總纂本衙門撰文丁卯  
視學四川捐廉修成都考棚刻詩韻辨字略明音訓  
之學所拔皆知名士有曾爲宮保戒飭者十餘年忽  
來謁曰吾非師幾爲名教所不容也辛未充文淵  
閣校理教習庶吉士癸酉充日講起居注官咸

安宮總裁 京察列一等復帶引

見記名以府道用尋陞國子監司業乙亥三月進翰林院侍講轉侍讀七月進右春坊右庶子八月

命爲河南學政河南沿十八年李文成之變羽黨未盡劫掠燔燒官捕未淨

仁宗諭官保知汝品學兼優操守自好並

諭察視地方盜賊及官屬捕緝事宜官保以滑縣之亂總由積習釀成凡地方吏治河工情形小事言之有司大不便者入告無隱廉知彰德衛輝兩府吏民習教者衆因將實在情形入奏兼陳州縣官編察保

甲有名無實狀

仁宗諭以所奏詳悉告知撫臣臬司商邱廩生陳忠錦因不濫保爲童生張鵬翼父子毒毆知府及經歷某受賕誣陳加斥責陳忿縊死其弟勉旃訟冤宮保列知府經歷罪于朝分別鐫革由是上下畏法兩河肅清每疏入

仁宗嘉歎稱爲實心化導正本清原者再累遷左春坊左庶子翰林院侍講學士留學政任回京轉翰林院侍讀學士

今上御極之元年奉

特旨充

實錄館漢

文總纂官七月

命爲湖北正主考累升詹事府少詹事詹事 文淵  
閣直閣事稽察西四覺羅學壬午九月升內閣學士  
充武鄉試副考官乙酉以刑部右侍郎視學福建旋  
調禮部右侍郎福州試院有地溝運竹筒傳遞官保  
捐廉修號積弊始清漳泉諸州尙械鬪上杭生員何  
某者強宗也以爭境地械鬪上控官保飭學扣考何  
訴之撫軍撫軍咨送考試官保不可治益急由是械  
鬪之風頓減臨行生員獻詩者幾千人己丑充會試  
知貢舉四月轉禮部左侍郎

命偕侍郎鍾昌馳驛審山西平定州朱葛氏案究出知州錯擬罪名并門丁受賄狀人稱明允是歲

賞紫禁城騎馬署兵部左侍郎改倉場侍郎壬辰調刑部左侍郎

命爲順天鄉試副考官癸巳進都察院左都御史充經筵講官甲午春仲 經筵充直講進禮部尙書命爲順天鄉試副考官調工部尙書時刑部尙書戴公敦元卒

上以刑部事繁重重調宮保刑部尙書宮保以人命至重侵晨進署書吏司員未至一人坐堂上閱視案件



如老諸生日暮未畢則攜歸陳几上燒雙燭審定遇疑獄與同僚難論再三或格於例則于

聖前直陳其情一事未安思之終夜積三年以爲常體素健自是恆不成寐會丁酉 京察屆期

制書褒美謂宮保刑名詳慎精力如常與今相國湯公金釗同列一等議敘宮保亦夙夜不敢自安然用是體亦瘳矣是年夏至後病下利旬餘稍瘥

上召見溫諭宮保力疾視事冬至前更苦煩躁十二月陳請致仕

上諭以安心調理不許次年二月復固請

上不得已許之猶  
諄諭以病痊後具摺請安蓋  
是時

上倚宮保方殷每

召對廷臣

詢問宮保病

狀至于再三宮保亦欲以餘生報

國臨終之日與

尙書祁公墳談國事疊疊如平時午後嘔吐作旋坐  
逝壽七十有九時道光戊戌十八年七月之十日也  
遺疏奏聞

上嗟歎久之

贈太子太保降

制賜卹有品

行端醇學問優裕明允精詳克盡厥職等諭復於七  
月三十日

上命禮部尙書吳公椿率太常寺司員

諭祭又

有鞠躬盡瘁性行純良等語可謂知遇之隆而哀榮之備矣宮保孝友性成識度淵懿丁母憂以父老哭不敢出聲用是失血痛兄早歿待弟尤厚族弟某少孤成立之既歿養其家待士以信寡言笑喜怒不形於色年弱冠卽以文爲金先生兆燕蔣先生士銓王先生文治所賞而厭爲迂疏無用之學生平讀書實事求是不爲門戶之見又謂刑所以弼教近世吏治不如古者以分刑教爲二也故爲學政時抑豪猾伸冤獄勒于有司官及官刑部訓飭屬官循循然如誘

子弟于浙江汪宗炎一案論大宗小宗引律據經作  
說帖數十紙曰倫常者弼教之本也先後在刑部最  
久主試者三爲學政三闕會試覆 殿試 朝考卷  
四歷遷五部所居官雖一日必勤于事性尤介爲諸  
生時富商某持百金求製壽屏文鄙其人不許其視  
學福建也囊空至不能還京自

兩朝恩賞書籍珍玩數十種外歿後家無餘財其陳  
請開缺奏有云卅年京宦參養恩深僑寓京師家無  
半畝非虛語也精書法所書經籍悉爲人攫去今所  
存十三經國語國策莊子皆五十後所書也所著書

惟考訂爾雅音義摹刻行世未刻者有榕莊詩文集  
若干卷外集若干卷歷代郊祀考若干卷配蔣夫人  
先宮保卒子三丙榮道光乙酉舉人戊戌進士安徽  
卽用知縣悠辰蔭生廣西試用知縣以芳林渡勦殺  
猺匪軍功升直隸州知州璜河南試用知縣女一許  
字秀水汪氏未嫁守貞孫三久開久恩久齡孫女三  
以十九年己亥十二月之十日葬于甘泉縣廟山旁  
團山之南闕家莊蔣夫人附焉丙榮等來乞爲神道  
碑銘元菴矣猶按狀序而銘之曰

五星聚奎爲文之祥人文大啟爲邦家光尙德緩刑

臯陶拜颺

帝用刑官空冬居陽故所褒者學行爲長一曰明允  
再曰純良以此銘碑佳城後昌

移建安淮寺碑

大凡事之鉅艱者久必變通其通也待其時亦待其  
人黃河入海歲遠必歲高黃既高而不能加清堰同  
其高于是蓄清刷黃借清濟運之說窮且湖堰橫決  
上河下河民逃穀沒者屢矣嘉慶末有爲南北兩運  
轉搬過黃之策者未行又有灌塘濟運之策遂行之  
南河總督麟帥值其時于是決計平淮消險上下河

田周回千里年屢大豐民安穀熟石米值銀一兩此  
得其時歟抑待其人而後行也麟帥不敢居謂此  
聖天子定策感召之所致亦

淮瀆神福民靈貺之所昭

天子親書淮廟扁修淮瀆廟麟帥率屬報祭遂復周  
覽泗州登眺龜山見有古佛出于水面察知爲宋無  
梁殿于是泗而拯出鐵佛鐵羅漢鐵鐘鐵鑊甚多移  
于山麓別建爲寺曰安淮寺神佛有靈應時而出庶  
幾昔年饑溺之民今日得見安瀾有如此麟帥又建  
船隴于老子山行船可避風浪復于聖人山下開通

舊河以避馬狼岡之迂險使民之事無不爲也麟帥  
慶己巳進士爲貴大宗伯慶所得士余己酉進士又  
大宗伯己未進士之座主也戊戌冬余乞

恩致仕歸來淮揚親見民生安樂寺工已成請爲碑  
文磨石以待銘曰

禹使庚辰鎖巫支祁今淮泗安加石闕之宋建古殿  
由金臂師鐵像出水因泗之卑泗渦愈卑民生愈治  
人力所通遭逢 盛時

歙縣江鶴亭澄里二公傳

鶴亭公諱春字穎長生時有白鶴之祥故號鶴亭姓



江氏徽州歙縣人祖諱演僑居揚州父諱承瑜皆以  
鹽筴起家行仁樂善周貧乏修津梁動費萬金並以  
公貴 封贈一品階公性警敏爲金壇王太史步  
青弟子善屬文尤長於詩與程編修夢星齊名以五  
經應試未第遂出其才治鹺業上官知其能檄爲總  
商凡重事皆與擘畫乾隆十六年

上巡幸江浙揚州迎

駕典禮距

聖祖時已遠無故牘可稽公勅立章程營繕供張纖  
細畢舉二十二年

南巡駐蹕金山

召對稱

旨

賜金絲荷包賞加內務府奉宸苑卿銜三十年

南巡修治紅橋東之淨香園蒙

御書怡性堂額

賜福字玉如意城東南高阜曰康山相傳明康海舊  
遊處有董文敏書扁公葺新之四十五年四十九年  
南巡

上喜平山之外得康山近處小憩遂再幸其地

賜額

賜詩有時花二月之中遇古樹千年以上論之句淨  
香園有雨過靜依竹夏前香想蓮之句皆卽

御書爲聯公理鹺務四十年中凡祇候

南巡者六祝

皇太后萬壽者三迎

駕天津山左者二最後入京赴千叟宴

國家有大典禮及工程災賑兵餉河餉捐輸上官有  
所籌畫惟公是詢公才裕識超專心

國事指顧集事不顧私計又更事久強記善用人事

有益於各省轉運者知無不爲規遠利而不急近效  
周急濟貧加意於書院養老院育嬰堂諸事每發一  
言畫一策羣商拱手稱諾而已羣商之受指揮不便  
其私者或退有怨言然而兩淮提引案發逮治羣商  
首總黃源德老疾不能言餘皆自危於斧鑕公毅然  
請當其事

欽差讞時叩頭引罪絕無牽引

上知公無私

詔釋不問獄解所保全兩淮之人甚衆太監張鳳以  
銷毀金冊捕逃頗急鳳至揚州謁公公於杯酒間縛

之

上飭議封疆大吏之失察者

特授公布政使司銜

上深知公誠盡有長才每跪迎

駕時望見輒加

詢問公貧無私蓄辦公力絀

上借帑金三十萬兩公運鹽之號曰廣達每鹺使者出都必

諭曰江廣達人老成可與商辦前後被

賜御書福字貂緞荷包數珠鼻煙壺玉器藏香拄杖

便蕃不可勝紀加級累

封至光祿大夫公偉岸

豐頤美須髯喜吟詠好藏書廣結納主持淮南風雅  
與盧轉運見曾同意趣水南花墅別業開並蒂芍藥  
轉運就公讌賞賦詩轉運北歸至召伯埭舟中賦詩  
始別北郊鐵佛寺荒寒多紅葉公數招杭太史世駿  
諸詩老清齋賦詩終日三十一年十二月十九日爲  
蘇文忠七百歲生日與諸詩人懸像於小山僧之寒  
香館賦詩一時文人學士如錢司寇陳羣曹學士仁  
虎蔣編修士銓金壽門農陳授衣章鄭板橋燮黃北  
垞裕戴東原震沈學士大成江雲溪立吳杉亭烺金

樓亭兆燕或結編紵或致館餐卑節虛懷人樂與遊  
風亭月榭觴詠無廢與玲瓏山館馬氏相埒所著有  
隨月讀書樓詩集三卷公感

重恩竭力圖報治公事戴星出入暇卽從事詩酒不  
自持籌算私積言事投書者數十輩林立隨方應付  
食頃已畢或曲劇三四部同日分亭館宴客客至以  
數百計恆以長物付質庫分給數庖以應之公以乾  
隆五十四年積勞致卒年六十九卒之日家無餘財  
賜帑未繳鬻產及金玉翫好以足數公無子初以弟  
昉季子振先爲子蚤亡復以次子振鴻爲子

上知其卒後貧復

賜帑

諭振鴻業離以繼其父振鴻始冠能文勤謹儉約力圖起其家不敢負

上垂念舊商之恩也

橙里公諱昉號旭東又號硯農鶴亭公同祖弟也父諱承玠以戶部郎中歷知浙江嘉興台州府事升浙江鹽驛道

誥授中議大夫清介多惠政母宋淑人早卒簪室萬淑人實出公三年而歿劉淑人教育如已出觀察命



公事之爲慈母劉淑人之歿也公哀毀行斬衰三年  
喪請封於

朝不知禮者或議之然儀禮喪服經傳曰慈母如母  
死則三年如母貴父之命也且今

國制慈母如母斬衰三年謂所生母死父令別妾撫  
育者吾故曰公知禮制公之孝也公性恬靜幼承觀  
察清白之訓內被淑人折襲之教遠絕靡麗惟以詩  
書自娛所著晴綺軒詩意境清遠得宋人高格尤工  
填詞慕姜白石張叔夏之風故其練溪漁唱詞二卷  
清空蘊藉無繁麗弱褻之情除激昂詬號之習可謂

卓然一家矣又嘗集宋元人七言詞句爲絕句詩九十首妙思清響如出已手所居紫玲瓏閣名士之至揚州者無不納履興化任進士陳謩公之師也任公子侍御大椿與公以經術品行爲友天台齊侍郎召南爲諸生在敷文書院觀察遇之極厚爲觀察門人與公亦以學相長錢唐厲太鴻鶚嘉興王穀原又曾暨鶴亭公諸賓客多主公家湖舫山輿聯吟覩句殆無虛日賓至則下榻拂几卷軸絲竹情賞靡缺故爾時文讌之盛稱二江公家公狀端凝性仁厚周急無德色詩人方介亭和有所陷公委曲用心以厚貲免

之汪雪礪本貧不能出戶公濟以服食共吟詠薦於  
鶴亭公餘事類此不勝紀湖北鹽筴領之者立致巨  
富積弊難釐鶴亭公薦公領之公不獲辭數年歸囊  
無餘貲至鬻田宅以償逋晚年尤耽山水有別業在  
蘇州太湖西磧山曰西磧山房嘗扁舟爲梅花往筆  
牀茶竈有天隨之風乾隆五十八年卒年六十七候  
選知府

誥授通議大夫子一振驚鹽運同知銜能詩工書

論曰元之王妣江夫人二公同祖姊也元幼讀書罕  
出戶不知外事弱冠入京師甫通籍二公相繼歿然

元敬聞吾父述二公之事詳矣鶴亭公矯矯獨出超轡前後深識

國體受

恩深重竭心力以終其身橙里公敬命報慈通經守禮有古君子風又皆讀書禮賢歿之日家屢空蓋不欲蒞利生孽負

國恩而墮家聲也嗚呼儻所謂忠孝者非耶

雷塘自定壽壙記

昔余因先考命葬前室江夫人於北湖橋鎮西陳家橋因而記之引檀弓樂哉瑕邱之言彼時因雷塘無餘地也嘉慶甲子以後在雷塘阡地祖墓之側得地數弓樹木久拱坐向端正且切近先祖考妣

墓之右夫能近依祖考豈復樂瑕邱哉己亥歸

里又再相之此爲最慰卽以爲余之壽壙繼室孔夫

人殯將亦附焉

乾隆間余官詹事時甚貧江夫人棺木不堅今必太朽且遠四十里斷不

能遷

矣卜地之說余所未諳此壽壙及所謂瑕邱者曾

有門生內閣中書端木國瑚相之以爲皆吉則皆吉

矣此地爲下雷塘塘水自西北甘泉山九女澗來注  
於東南又有楊家澗水自西北來會之於辰方壩前  
地皆舊松柏百餘步以南樹少乃低爲豆麥田又數  
十步更低爲稻田平圍千畝形家所謂明堂也雷塘  
瀦水漢唐宋元皆然明時不賴此水濟漕豪家雖占  
涸爲田而仍恃兩澗水以爲灌漑西漢雷塘卽雷陂

漢書寫  
作波

漢書云江都王建游雷波使郎二人乘小船

入波中船覆兩郎溺攀船乍見乍沒建臨觀大笑西

征記云雷陂有臺高二丈卽吳王濞之釣臺

臺所在  
無考

考寰宇記諸書最西小新塘

卽宋紹定  
滅李全處

水下注上雷

塘上雷塘轉入中雷塘由槐子河東流入官河

明舊志下

塘水廣長皆七里佃田一千六百餘畝漢唐宋元山水無改余家墓則

在中雷塘東南望見出水之地之外下雷塘卽槐子

河也

背高塘荷花塘馬篷灣決口時槐子河水皆倒漾至雷塘田前近年江湖水大亦倒漾槐

子河上卽古東塘也

卽唐高駢檄四方兵討黃巢駢屯兵不行處亦秦彥與楊行密

戰不利所奔之東塘也予遷揚四世祖尊光公於崇禎末始葬

雷塘阡六代曾祖宗尹公七代祖琢庵公皆繼葬於

此八代考贈大學士嘉慶十年亦葬此此阡高臨

塘上

阡地在明以前想亦豆麥高田耳地脉從甘泉山來十餘里塘

水與楊家澗水會于阡東南元至正年造閘於上雷

塘明成化年於上下塘各造石閘水碓以爲蓄洩今

阡東南隱然尙有閘碓舊基傳聞廢閘涸塘爲田始

於明仇鸞時

顧九錫詩序云雷塘烟雨迷離近被土人開墾爲田丁未再過之見昔時鴈影

漁帆忽變爲樵歌牧笛此當在明末

隋煬帝墓在吳公臺卽今觀音山

唐高祖時以帝禮改葬於雷塘在吾家阡北三里許

高岡上余曾培修之立碑伊太守秉綬案舊志題碑

曰隋煬帝陵刻之阮氏阡西里許爲阮氏墓廬造廬

掘地得元大德龍王廟碑蓋廬卽廟地因立碑於門

內卽以廬前屋祀龍王中屋爲觀音堂後屋爲高樓

東望墓阡南望蕪城阡城之間尙有雙澗慨然想見



漢江都王之游雷波也焦君里堂題扁曰阮公樓置僧

守之曰雷塘庵自刻雷塘庵主小石印廬西南故冢爲明南京禮部尙

書王軌墓五代朱瑾墓在雷塘今覓不得嗟乎壽壙古人多爲之矣

漢趙邠卿中年病卽囑兄之子爲立員石於墓前曰

漢逸士趙嘉墓岐先名嘉及年九十在荊州別爲壽藏去聲

唐司空表聖自爲生壙引客賦詩飲酒於壙中客或

難之哂之曰何不廣耶此外爲生壙者不勝舉今年

夏夜宿樓上東望祖考墓松柏鬱蒼泉原交屬

余以衰跛昏耄得乞骸骨將依先人而永宅乎此矣

魏傳永登邛山遠慕杜預近慕王肅欲歸於此日此吾永宅也唐姚崇曾孫勗自爲壽藏於崇墓旁日寂

聖經室再續集卷二  
无二集

居穴

雷塘壽壙孔夫人先葬記

晉杜元凱遺令自定兆域法鄭大夫古冢之儉妻郭氏合葬且曰中古以來或合或否各以已意所欲杜氏深于左氏傳斯言必禮也今元妻或合或否非以意定江夫人以乾隆六十年葬于道橋之陳橋觀非美槨朽不能遷繼室孔夫人以道光十二年卒于滇十三年冬到揚州殯于道橋祠右可以合元壙既定雷塘矣爰于道光辛丑年十二月庚子先葬此右者至于元凱妻郭氏先葬耶遺令遷殯耶不可得而知也祠右之殯先葬待合合乎蘧伯玉瑕邱請前之諷

陳橋之殯不遷不合合乎宋司馬石槨速朽之譏子  
貢願有所息仲尼曰望其墳畢如也宰如也鬲如也  
則知所息矣今所營卽此所謂墳也墳亦古矣壬寅  
正月來雷塘壙前積雪初消松柏皆拱石楠海桐亦  
數十年木也復乘椅至松南瞻望麥田觀雷塘橋水  
來與楊家澗水會處元凱所謂已意所欲卽已心所  
安也書此以示子孫

道橋別業愛吾草廬八韻序

余幼年居室雖陋然皆瓦也十歲來道橋輒愛草廬  
歲壬寅夷盜盜鎮江而揚州戒兵予先在道橋穫麥  
更愛道橋草屋爲平安矣癸卯正月二十日余八十  
生辰仍茶隱也將避俗來道橋別業秣瓦屋八九間  
無草屋因于池北築草屋四間在桑榆梅柳松竹之  
中止四間者礙竹木也余歸田成南萬柳堂圩田五  
百畝歲務農以爲食此草廬高燥淨潔在萬柳堂小  
西湖之西以數十千錢成之題愛吾草廬以遂初心  
及今

恩諭林泉之志而已城中壽日以屏幃宴樂爲美惟  
余四十五六十歲皆早以茶隱一日卻此等事不  
待今日日知錄曰溯言生日非美事小弁始說我辰  
離騷乃言初度顏氏家訓謂生日之禮起于齊梁逮  
唐宋後開筵召客賦詩稱壽于昔人反本哀齋之意  
去之遠矣畢韞齋云文選六十卷雖齊梁亦無壽日  
之文必爲昭明所刪故王秋已預卻于衆矣姑以此  
草廬自愛且欲勸俗而矯之亦追守嘉慶初清儉持  
躬之

傳諭也况辛丑

萬壽不舉慶典而

臣

下自言壽謂之無禮

國家多事臥病無寸勞而喋喋言壽謂之無恥無禮

無恥胡不遄死言至此是亦不可以已乎

人生八十古更稀古

賢論德難與齊林泉田舍天許歸草廬安得高樓  
題四間新構杉板扉草簷竹竿塗白泥繩牀愁夢  
心息機夜聲不聞犬與雞此間佳趣得幾希紙窗  
况無風雨淒春初梅瘦麥葉肥松竹下壓香茅低  
茶隱求是酒則非夕陽又暖桑榆西  
萬條楊柳春依依絳老後算誰端倪

### 項羽都江都考跋

劉孟瞻明經

文淇

作項羽都江都考據史記秦楚之

際月表第三格知項羽自立爲西楚霸王都江都然  
則項羽曾以江都爲都是秦楚之間早有江都之名

非始於景帝矣此說甚爲新異可喜及檢新揚州府志沿革建置門有雙註云史記秦楚之際月表有項羽都彭城一本又云都江都考諸書無羽都江都之事殆傳刻誤此蓋嘉慶年間修志者見有無江都之本而致疑也

明人程正揆所刻張守節正義本月表脫去都江都三字

余檢至此

亦爲之疑因思余家文選樓有舊本史記檢之則是元中統二年連索隱之板明明有都江都一事爲之大快然則府志所云有江都者古人之遺無者爲妄人削去也元中統與宋理宗時相值則與宋板無異

桐字缺筆世所習也

此書古色古香恐勝於今單行索隱之處



尙多俟再校之因復思古人如項羽者滅秦封漢氣  
蓋一世快意之事正在爲霸王都江都之時而江都  
王者以項氏爲最先乃此事黯然不彰縣縣欲絕幸  
賴明眼人於旁行斜上蠅頭細書之月表識別而出  
而又得此霉爛蠹蝕五百餘年之故紙爲之確證所  
以古本之可貴如此道光二十年

校刻宋元鎮江府志序

余家久藏宋嘉定元至順寫本鎮江志二部乃乾隆  
六十年宣城張木青學士素所贈之書嘉慶間曾經  
進呈內府又錄兩副本一藏家中文選樓一藏焦山

書藏以待有志者刊之良以二書有關於京口之掌故甚鉅也京口自東晉以來屹爲重鎮流民僑郡分併改隸都督開府參佐從事寄泊版授建置紛煩以及宋之差遣元之掾屬讀史者憚於鉤稽往往沿訛襲謬今詳觀宋志於六朝僑寄郡縣縷析條分於節度觀察等官罷復紀之甚詳其刺守厯任年月於紀傳所不載者皆稽考得其次序是故一人之傳必參酌羣書而後定如刺史韋損傳以唐地理志練塘碑及李華復練塘頌序招隱大律師碑參定都知兵馬使張子良等傳以新舊唐書李錡傳舊唐書憲宗紀

通鑑太平廣記參定此例爲前此作郡志者所未有  
至於元至順志本承宋志而作然絕不勦襲其書宋  
志於刺守宰貳等官載至嘉定九年止而元志卽從  
嘉定十年起其例尤爲可法土產門引說文廣雅字  
林方言等書亦地志中所僅見又二書於晉宋以來  
士大夫居宅墳墓皆詳其坊巷鄉都所在其作銘作  
記之人亦莫不羅列雖遺跡久湮而按籍考之猶可  
得其彷彿後人性好簡略鮮有及此之詳明者其餘  
精當處亦不勝僂指二書洵海內之秘笈也乃問之  
鎮江人無肯槩之者余於送楊忠愍公墨蹟歸焦山

記中已慨乎言之去冬丹徒包景維

良丞

介吳陶伯

孝廉

文鑄

來謁余談次及之景維因言及其考中憲

知有是書欲刻未果今願刊布以成先志余因出家

中選樓本並發焦山書藏本

校竣仍還焦山

再加緝閱選樓

本爲歸安嚴久能

元照

所校焦山本爲烏程張秋水

鑑

所校又丹徒戴桐孫

守梧

亦有籤記其中精確者

致多然輟引其端未竟其緒復屬門下士劉孟瞻

文

洪暨其子伯山

毓崧

詳考全書體例及所徵引各書

正其譌誤作爲校勘記四卷附刻於後二書俱不著

撰人姓名書錄解題有盧憲鎮江志宋志中稱憲者

四條因共定嘉定志爲盧憲所作而至順志則不知  
出於誰手適丹徒柳賓叔孝廉

興恩

以書來告謂檢

鎮江府志成化舊序知至順志爲俞希魯所作余按  
俞氏乃元末遺老爲金華宋濂所推若非詳撰此志  
烏知俞氏之學精密若是則刻書洵有功於古人也  
是書初刻時不知書中載包氏名人甚多乃校勘後  
知包氏爲丹徒舊族宋元二志人物門俱以漢大鴻  
臚包咸爲首厥後包融包何包佶俱有名於唐代而  
元志俞庸修高資橋記亦言丹徒包氏不墜先業中  
憲名祥麟字厚村捐貲施藥頗多善舉實爲鴻臚之

後雖此書朽蠹而班班可考然則是書之刻於包氏固天理當而人心安也刻既成余故樂爲序之以爲刻古書者勸

大清道光二十二年夏至日

畢韞齋母郭孺人墓誌銘

母姓郭氏字蘭崖甘泉人

詔舉博學鴻詞諱

朝松之曾孫戶部廣東司主事諱隆舉之孫附學生諱增之女子子也幼習詩書嫻禮教事節母以孝聞年二十畢蓼村先生聘爲子春原之婦時三族多虞家業中落母躬持節儉終歲食貧左右服勞不遺餘

力念庶士以下皆衣其夫執臬治繭以共衣服教子  
光琦嚴而有法親授經自論語孟子詩禮皆口授章  
句兼詳詁訓篝燈自課凡越十年光琦入泮宮游藝  
四方戒以黜華崇實敏事慎言述廣平之節義陳王  
屋之清廉勿忘故實以珣家聲母熟繹家乘以唐廣  
平太守畢炕天寶之亂家覆贖戶部尙書謚忠及王  
屋尉畢垌清廉見昌黎集也歲庚寅母劬勞成疾氣  
弱體羸至冬日而疾革光琦跪於牀下誨之曰儉爲  
令德不可不慎桐棺三寸言終而卒是道光十年十  
二月十八日也將以某年月日葬於揚州之原西倚

蜀岡東界漕渠光琦乃蕭山湯相國督學時所取佳  
士爲余門生門下士也歲乙未余入內閣每宿集賢  
院在經郛中錄出詩書二經爲詩書古訓六卷尙須  
校正刪補蕭山言光琦可任之歸里晤言知其經學  
明敏閱三年而校刻成書光琦言其母之賢若不及  
時求撰誌銘則不能如昌黎之傳王屋也以狀來乃  
序而銘之曰

魯敬姜言見列女傳賢母有子學行必見惟訓乃傳  
惟勤乃儉詩書克敦淳華不染亦祗以異富則異掩

江都春谷黃君墓誌銘



君諱承吉字謙牧號春谷黃氏其先歙人自晉新安  
太守積卒於官葬姚家墩子孫家焉因號黃墩唐御  
史中丞德之季子璋由黃墩遷黃屯曾孫芮以純孝  
著唐書孝友傳序父沒北渡潭水廬墓終身故名其  
地爲潭渡世祀璋爲潭渡始祖是爲潭渡黃氏唐以  
下代有聞人曾祖克轡祖修溥歛文學父其林國子  
監生皆以君官累贈通奉大夫君幼讀書聰敏博綜  
兩漢諸儒論說府教授全椒金棕亭先生退官時僑  
居相近一見卽贈詩曰騏驥在東隣三年不相識又  
曰顧我桑榆人十駕安可及其傾許若此弱冠補江

都學生員與同郡焦里堂循李濱石鍾泗江鄭堂藩  
諸先生友善日以經義文事相切劘當時有江焦黃  
李四友之目嘉慶戊午科中式鄉試解元乙丑科會  
試中式賜同進士出身卽用廣西興安縣知縣再署  
岑溪縣事充戊辰 恩科鄉試同考試官君勤於政  
在岑溪時有乙爲甲傭種山僻地忽告歸久不至而  
乙妻子則以索乙於甲控繼乃控甲因鬪斃乙並有  
風聞時日及埋尸於水塘側處君細鞠多次察甲辭  
色非殺人者而乙妻子方固爭不已又訪乙家則方  
治喪事旦暮聞哭泣長子曰荷鋤尋掘父尸君不肯

濫引左證惟於乙妻子前後所供不符處獨加研詰  
胥隸嘖嘖非議太守廉知使人規戒之君旣確有所  
見益究得實情匿乙於廣東羅定州欲以詐甲財遣  
遣役往獲之甲始不寃爲同考官時偶詣他房閱一  
落卷謂其文義精奧古茂當時冠場及薦主司果置  
解首揭曉爲汪能肅浙江名宿而寄籍粵西者也然  
君於公所議事率以才能屈其坐人緣是漸爲同僚  
所詆上官亦竟以文書過境失落未能遽獲劾罷之  
至道光六年始得捐復且捐道員需次復因齒就衰  
遂一意發憤著述無出山之志所著夢陔堂詩集數

十年總五十卷體物摹景敷事類情尤善於樂府古  
辭其著述則校證經史鉤稽貫串每出曠識正古文  
人之是非嘗以司馬遷爲孟子後尊聖道明六經之  
第一人而揚雄謂遷行不副文是非繆於聖人班固  
亦卽以其語爲遷傳贊又於傳中兩太史公牽混其  
辭於百官公卿表成帝紀張安世京房等傳內抹沒  
增添之使中書合一官不知何職助雄抑遷以爲已  
地故漢書本不應爲雄立傳而固欲黨雄特變史例  
全錄雄自序爲傳遂於仕莽事略不及因並論雄毀  
東方朔致毀柳下惠爲鄉原仁賊謬指靡麗勸風字

貶賦傾毀司馬相如於事後追序甘泉賦自謂風戒其實甘泉賦通篇專以崑崙諛頌獻媚趙昭儀則比之西王母又稱賦爲雕蟲篆刻壯夫不爲至使後生將以文爲詬病其河東校獵長楊逐貧太元諸賦辭意雜亂鄙陋有乖文體太元合天應歷全爲臆說作文說十一篇以辨正之總三十餘萬言蓋謂千古之文人受此誣枉不辨此第一誣枉餘可不必言文不如此力挾其文之非則不能實求其文之是此其所以發憤者也約其所論說自楊雄有雕蟲篆刻之說致文爲後世詬病首著其非以明文章關繫至重第

一論法言內謂賦爲童子雕蟲篆刻壯夫不爲其壯夫乃指壯年及考雄賦皆是壯年所爲第二論揚雄漢書中不當有傳第三論漢書中揚雄傳是雄自作第四論揚雄甘泉賦賦與序不合第五論甘泉賦通體皆以崑崙談頌第六論揚雄河東校獵長楊逐貧太元諸賦第七論揚雄設風勸二字貶賦就以誣陷司馬相如乃先誤解詩序兼誤及一切經書第八論揚雄因毀東方朔致毀柳下惠爲鄉原仁賊並論法言中各等辭第九論漢書中多誣陷司馬遷之語第十論太元自謂合天應歷其實所說皆臆數與天歷

不合第十一凡此十一篇三十餘萬言於是千古之  
誣枉始正人心之是非始正人心之忠奸始正經史  
之是非孔孟之指歸是非亦皆正然則君之不出山  
特爲司馬遷雄固定此一案也使君出山復能辦岑  
溪等案官至督撫終碌碌以歸不及此數十萬言者  
俾世人皆知尊文重道而相與傳習其說如不解其  
所說何事置其說於若存若亡可有可無者則其人  
適自歸於不讀書之人於君何損哉

欽定四

庫書內有字詁義府二書爲君族祖黃生撰君出康  
熙間家藏鈔本刊之又加按語以發明聲音訓詁又

著經說若干卷君生於乾隆三十六年十一月十七日卒於道光二十二年七月三日得年七十有二君子必慶爲晚年鍾愛屢見於詩獨吉於二十三年十月十六日奉君殯葬於甘泉西山雙墩妻江恭人附焉恭人 召試內閣中書戶部員外郎漣女以道光十二年卒側室劉氏生必慶以貲爲員外郎例封劉爲宜人女二長適儀徵學生程官埭必慶介王生翼鳳以狀來乞爲銘銘曰

黃君之學在於文說雄固枉遷無人能決熟精古書其私始訐誣二千年其冤始雪書恭大夫綱目早閱



自餘史情尙昧曲折惟君說之明明布列旣正文章  
又正臣節鳴鼓而攻盟皆歆血有不與盟人必愚劣  
我銘佳城文亦不滅

北渚二叔墓表

阮元從叔阮公諱鴻行二字遠陽又字湘南號北渚  
七十後自號蟄室老人三世祖官榆林衛千戶始卜  
居揚州北湖元高祖與公會祖諱樞忠爲兄弟始分  
房樞忠公通經史兼善騎射康熙庚戌科武進士分  
發江蘇撫標中軍學習子三長諱殿衡習文舉業考  
授州同知爲公之祖次諱匡衡癸未科武進士官滁

州衛守備以官贈曾祖武德將軍父諱金堂字宣廷  
儀徵學增生以公職 贈奉直大夫宣廷公生二子  
公其仲也乾隆丁酉六歲就傳十一歲以弱疾輟書  
就醫三年甫愈仍力於學從堂伯衣谷明經學庭訓  
甚嚴雖愛憐甚摯而勗以讀書作文不稍寬由是益  
淬於學丙申冬宣廷公以痰嗽成疾公侍湯藥衣不  
解帶公母張太宜人刲股以進事載焦循北湖志節  
孝中逾年宣廷公卒公哀毀骨立慎始慎終克盡其  
孝以家貧無以爲養越一年就館於外遙師姚雨田  
廣文每入城謁師與程中之方贊元方月槎爲師友

相砥礪廿一歲張太宜人衰病公不忍遠離遂移館於本鎮吳氏恆薄暮至家省視吳氏以公訓誨嚴勤延待十年之久得館地以力學藉館金以養母公於胞兄載陽公極友愛己酉歲同受知於豫堂胡侍郎同入學而宣廷公已下世十餘年孀親茹苦得以稍慰王子鄉試一邀房薦癸丑因元官詹事張太宜人命公入都應順天之試俄元奉山左學政之命

公之年與元相若應童子試時卽相善且知公品學優長以故延請衡文公偕行至署按試青萊等府靜坐高樓閉門閱卷不草率寓今日初心之意歷城時

幕友未多元惟公是賴夏試畢始與里堂焦君秋平  
黃君登岱賦詩入曲阜 聖廟觀禮有山左筆記

一卷二年元調任浙江學使與朱椒堂端木子彝陳  
曼生爲同幕有幕中閱卷稍率者公微窺之索落卷  
置室中夜燭達旦披覽再三偶得佳卷因嘆曰此佳  
士也迫促風簷甘苦吾數嘗焉微吾又屈矣亟持告  
學使元果卽拔之時元虛心禮士而內嚴察因叔公  
正明察之力得士無錯悞至院棚關節元防杜至密  
至金華巡捕搜得小人私書云衙門內大人叔子一  
關難過可見助力矣公三十九歲元撫浙隨先考光

祿公商立義舉建族祠修祖墓立田贍祭置禮祀洲  
蘆息定規條族中祠墓祭埽婚嫁喪葬敬節養老義  
塾考費等事咸備數十年矣公卒曰元往哭奠書輓  
聯云魯浙試文章杜絕院棚關節江湖種蘆稻籌開  
祭贍章程紀實也甲子四十五欣然赴省試因瘡未  
果乙丑春先考命元建家廟於揚州屬叔董其事公  
落成之初先考憐公與撫署中林季修皆有才欲公  
納知縣資公曰吾無資毅然不可且曰吾不肯苟合  
于人作吏非所宜也且族無多人當佐中丞治家政  
睦姻諸大端可已議遂止丙寅冬十月張太宜人以

疾卒公哀毀如初己巳公年五旬辦江洲事有鎮江  
某恃強爭佔訟於鎮江府府得賄倚其丈人之力後  
大府委勘乃服誣公不忍窮以律制惟剖明定案而  
已繼乃決計歸家以靜爲樂矣自撰小歇記以見意  
壬申五十三歲生長子克甲戊年生次子先丙戌年  
生季子充公性儉約惟老屋數椽積書滿壁晚年罷  
舉業納布政司理間始得贈其親道光元年公六十  
一閉門課子江都陳邑令雲伯欲以孝廉方正薦公  
力辭不就足跡不入城市二十餘年有塾室集旋作  
旋塗抹之有句云年來養病無他福興到詩惟信口

題又有句云自見虛懷聊種竹無多老友但聞鶯丁  
酉公命次子先赴試春明吾老尙健汝勿以爲念促  
之行時元已補體仁閣大學士公命弟先師事元  
元視其才樂教之試冬寄札於公云四弟先聰明與  
之談論學問頗能領會卽如三場言孔安國卒在漢  
武帝巫蠱事前寫入策內非試官所欲聞也公覽書  
而樂之戊戌冬元予告歸田公已七十有九正  
月初二日公八十壽元率子稱觴和公句云喜得白  
頭同壽考羞將畫錦耀維揚相見時執手言歡悲喜  
交集蓋元時年七十有六矣已亥春正月以湖莊久

沒于水與公議築隄種柳成一別墅以娛二老因屬  
公子克先兩弟董其成顏之曰南萬柳堂繪圖賦詩  
時相遊聚種蓮忽得並蒂二榦壬寅春杪元又置別  
業於道橋與公宅通相聚彌近夏子湖王子卿太守  
來別業一庭三老留連竟日因手書一聯云百歲老  
人談舊事一庭新綠煮春茶癸卯正月廿日元八十  
壽辰先期來別業與公作竹林茶隱之樂旋聞

賜壽之命公精神尙健率族同叩謝 天恩且與

元約曰俟二月杪賁 賜到揚予尙可來城隨跪

迎敬瞻 天翰文綺闔族與邀光寵甚盛典也未



幾身體軟弱飲食漸減因召子及甥及壻來曰予年八十有四不第不壽矣汝等讀書者勵志科名習會計者守以儉約予以清白之躬飄然長往無所苦也疾革元親至橋視公公以手指曰微矣時氣息奄奄不能出聲然耳尚聰心尚明也越一日而逝嗚呼以公之才宜早掇科名出而爲政必能展布乃自安時命而贊永祠能持大體宗族鄉黨賴之書云惟孝友于兄弟永亦爲政奚其爲爲政公之謂也公生于乾隆歲庚辰正月初二日卒于道光二十三年歲癸卯四月廿七日享年八十有四元配趙宜人繼配吳

宜人副室張孺人朱孺人孫孺人長子克國學生次  
子先肄業生季子充國學生少年工詩畫孫二人慶  
生瑞生女九人婚配皆名族元從兄子不敢銘叔且  
嫌銘石薶幽不若表出于外故爲阡表使鄉人族人  
皆可拜墓而讀也

文學家幹王君墓表

君諱家幹字峙亭姓王氏儀徵學生系出太原元末  
有福二者從明祖起淮右積功至金吾衛正千戶葬  
儀徵東鄉烏塔溝子姓蕃衍遂著籍焉君十四世祖  
復旦順治辛丑進士十六世曾祖夢麟祖洪恩父元

彪皆列名庠序君七八歲時侍母喬孺人寢恆終夜不敢一展側其身恐驚母睡云壯負用世志奔走四方屢應省試不得舉五十外始歸而教授鄉里九經皆手寫授子孫讀家至貧簞時館穀爲生計君乃節嗇衣食有餘弄之篋中旣年七十則出數十年所銖積者躬自修治千戶以下諸祖墓又整理宗祠祠田畝分呈官立案以防侵失審定祭器儀注歲時率族人舉饋奠禮恆恪恭將事曰吾老矣惟此事不可使稍懈也君卒於道光二十二年四月三十日年七十有八葬甘泉縣金匱山縉石街原妻劉孺人附孺人

順德內修勤勞好禮先君十五年卒長子僧保生員  
次翼鳳廩生次慶保孫五長建和生員餘業儒翼鳳  
以狀來乞銘墓之文余撮其難能者著於篇爲之銘  
曰

孝敬夙成在童穉髦修宗祠守弗墜力能奉先否者  
媿侍中不廟禮所議吁嗟王君篤勤志積久守艱成  
廟器孝于惟孝錫爾類